

ersten. Got geve, dat ydt my nutte sy tor selen salicheyt! My wyl ovel tho schryven syn, wente ick byn wyt van jw. —

Ock synt in Indyen hyr vele allegarten im water, in Dudesche spracke cokodryllen ghenomet, 4 korte fote, groten klawen, daran eyne langen stert grot. Vor den besten moghen de katyven nicht aver swummen, dat se mogen nicht wech kamen, de allegarte heft se enwech. Hyr in dyssen lande wasset de pambom vel, dar de groten notte uppe wassen, de me Kalkunsche notte nomet. Beter bom mach wol nicht wesen. Me macket schone sote melck van der karne, me macket dar oly van, me sammelt dar dach unde nacht drynckent af, me macket dar ock towe af tho schepen, de moren neyghen dar ore schepe met tho hoepe, se maeken dar segel af tho den schepen, myt synen love decken se ore huse unde macken dar de want af tho oren husen. Dat drynckent, dat se van dem bome samelen, is sote, wen men ydt fasek dryncket; wen ydt sur wert, macken se dar wyn af, ydt is der swarten dranck. Wat se ock in Dudeschen landen schryven van elefanten in den weltbocken, wo se one fangen, unde wen he folt, kan he nicht wedder upkamen, dat is loghen, wente dyt Oryenten unde Indyen is ful elefanten. Dem wylden kan me nicht wol entlopen up evenen felde, dodet den mynschen, aversth barch up berch dal unde de krumme umme tho lopen is em de mynsche tho gherade. Groter unde starcker best mach nicht ghefunden werden. De man, de em up dem nacken sytt alsze eyn kyndt daruppe, wat ne em het, dat deyt he, wat he em vorbutt, dat lett he, wat em de man secht, dat deit he, gruwelicker starcke unde arbeyt. Wen de man up unde af wyl, so lecht sick dat best neder efte holt om dat bein tho, wo ydt de man hebben wyl. Vorstendyger best mach nicht wol syn, unde is grot unbehende anthosende, behende in syner arbeyt. De groten konyneck bryngen orer wol 5 ofte 6000 in den krych, up eyne yderen eyn holten hus, dar 2 barsen unde 2 ofte 3 man uppe, de dar van scheten unde wer utdoen. Men byndet om ock eyn lanck mest an synen trunck, de om vam koppe afgeyt bet up de erde, dar he myt houwet. Dorch den trunck dryncket he unde sticket dat etenth darmede in de munt, brucket syner ghelik eyner hant. Se bryngen ock vele dusent perde in den krych, unloffick tho schryven, nene grote gule, syn ghelike Schutten perde in Dudesche lant, overst eyn ander art, sere dure, eyn pert 2, 3 ofte 5 ofte 600 ducaten, dar na se syn. De konyneckrycke se bryngen lichtlick 4 ofte 5 mal hundert dusent man int felt.